

写墓志，飭门者谢客，而丽生、笠臣并过久谈，草率成章。下午诣曾沅浦宫保谈。

初八日。接唐羲臣、朱禹田、王荔村、邓星五、饶岱霞、葛瀚丞、言湛甫、龚眉生、易菊生及敏夫、鹤九、寅伯各信。亦寄潘伯寅尚书一信，由日升昌邓星五汇递，惟得其一回片而已。又由邓子柔寄况颜山太守一信。龚少兰、少溪、王惠泉过谈。回拜邓葆之，田月村，龚少兰、少溪，张雨珊、冶秋。

初九日。微雨。吴莱庭、张冶秋过谈。张笠臣约为重九之会。自去夏至今，佳节皆虚度，笠臣始举行也。同席吴云谷、熊鹤村、傅青馥、李次青、邓葆之、彭丽生共八人，合五百十二岁。云谷年最少，才五十一。笠臣、葆之各五十三。吾与青馥各六十六。丽生七十七。鹤村八十三。实在王午云处会饮，分两局围棋。有诗云：午云湖上有高楼，九日招酣酒百瓿。荆树几枝花正放，楸枰两局子分投。时方凉薄君青眼，客尽英年我白头。赖有少年狂兴在，秋行春令寄清讴。又叠前韵为诗云：才向王维问倚楼，又同张旭倒琼瓿。酒多情绪诗难写，客自流连辖漫投。叙齿欲追伊洛侣，衔觞岂必华峰头。却因重九生奢望，高处年年共醉讴。

初十日。接徐雨之、郑陶斋、邓弥之、彭笙陔各信。笙陔并寄示所著《诗通□》，由邓葆之送到。黄绍晞、张晦甫过谈。

十一日。接黄幼森、盛锡吾二信。锡吾见示重订越南国图，并徐晓山所绘图。徐图盖详于文而略于事，于西贡及保胜扼要之处多从阙如，则并绘图之意亦失之矣。孙春皋、郭乔生、郭兰生枉过。是日李次青、俞鹤皋、成静斋、陈德生、黄子襄邀集浩园，会议意城附祀三公祠，予为之主。到者十二人。王逸吾、瞿子玖皆未登席。其留饮者：徐云渠、彭丽生、王雁峰、李次青、俞鹤皋、成静斋、陈德生、陈璞山、李仲穆、任禹田。惟凌问樵、汪